



REPUBLIKA E SHQIPËRISË
KOMISIONI QENDROR I ZGJEDHJEVE
KOMISIONERI SHTETËROR I ZGJEDHJEVE

Data: 28.02.2025

Nr: 229

Ora: 12:00

VENDIM

PËR

**SHQYRTIMIN ADMINISTRATIV BAZUAR NË DENONCIMIN NR. 20 ID,
DATË 17.02.2025, TË REGJISTRIT TË DENONCIMEVE, TË KOALICIONIT
PËR REFORMA, INTEGRIM DHE INSTITUCIONE TË
KONSOLIDUARA/KRIIK**

Sot më datë 28.02.2025, Komisioneri Shtetëror i Zgjedhjeve, mori në shqyrtim çështjen administrative me:

KËRKUES: Koalicioni për Reforma, Integrim dhe Institucione të Konsoliduara / KRIIK

SUBJEKT: **Zj. Ardita Kuçi**
Drejtor i Përgjithshëm, Agjencia për Zhvillim Bujqësor dhe Rural;

Z. Ilir Ajdini
Drejtor i Përgjithshëm, Autoriteti Kombëtar i Veterinarisë dhe Mbrojtjes së Bimëve;

Z. Ali Kaxhaja
Drejtor, Agjencia Rajonale e Ekstensionit Bujqësor Tiranë;

Z. Vullnet Gjolla
Drejtor, Agjencia Rajonale e Ekstensionit Bujqësor Korçë;

Z. Pjerin Spathari
Drejtor, Agjencia Rajonale e Ekstensionit Bujqësor Shkodër;

Z. Gentian Selami
Drejtor, Agjencia Kombëtare e Duhan – Cigareve;

Data: 28.02.2025

Nr: 229

Ora: 12:00



“Për shqyrtimin administrativ bazuar në denoncimin nr. 20 ID, datë 17.02.2025, të regjistrit të denoncimeve, të Koalicionit për Reforma, Integrim dhe Institucione të Pavarura/ KRIIK”

Zj. Jonida Boçi

Drejtor i Përgjithshëm, Instituti i Sigurisë Ushqimore dhe Veterinarisë

OBJEKT: Përdorimi në postimet e aktiviteteve institucionale të Institucioneve në varësi të Ministrisë së Bujqësisë dhe Zhvillimit Rural, të sloganeve/hashtag-eve partiakë/elektoralë

BAZA LIGJORE: Neni 19, pika 1, shkronjat “dh”, “f” dhe pika 2, neni 91, pika 1 të ligjit nr. 10019, datë 29.12.2008, “Kodi Zgjedhor i Republikës së Shqipërisë”, të ndryshuar, nënpika 1.3, pika c, të nenit 3 të vendimit nr. 9, datë 24.12.2020, të Komisionit Rregullator.

Në përfundim të këtij shqyrtimi,

K O N S T A T O J :

Koalicioni për Reforma, Integrim dhe Institucione të Konsoliduara (KRIIK), më datë 17.02.2025, ka paraqitur në Komisionin Qendror të Zgjedhjeve (KQZ) nëpërmjet adresës së postës elektronike e-mail denoncimin e administruar në regjistrin e denoncimeve me nr. 20 ID.

Nga shqyrtimi paraprak i të dhënave që përmban denoncimi si dhe dokumentet bashkëlidhur tij pretendohet si vijon:

Në këtë denoncim KRIIK parashtron sa vijon:

“Përgjatë gjithë periudhës parazgjedhore, në faqet zyrtare në “Facebook” të disa Institucioneve të varësisë së Ministrisë së Bujqësisë dhe Zhvillimit Rural janë duke u përdorur slogane elektorale të Partisë Socialiste, në formën e hashtag-eve.

Këto slogane është vërejtur se i përmban Faqja Zyrtare në Facebook e Institucioneve të mëposhtme, Institucione këto në varësi të Ministrisë së Bujqësisë dhe Zhvillimit Rural:

- Agjencia për Zhvillim Bujqësor dhe Rural;
- Autoriteti Kombëtar i Veterinarisë dhe Mbrojtjes së Bimëve;
- Agjencia Rajonale e Ekstensionit Bujqësor Tiranë;
- Agjencia Rajonale e Ekstensionit Bujqësor Korçë;
- Agjencia Rajonale e Ekstensionit Bujqësor Shkodër;
- Agjencia Kombëtare e Duhan – Cigareve;
- Instituti i Sigurisë Ushqimore dhe Veterinarisë”.

Me vendimin nr. 114, datë 20.02.2025, të Komisionerit Shtetëror të Zgjedhjeve (KSHZ), u vendos fillimi i procedurës administrative, për shqyrtimin e këtij denoncimi. Bazuar në këtë vendim i’u kërkua personave përgjegjës pranë Agjencisë për Zhvillim Bujqësor dhe Rural (AZHBR), Autoritetit Kombëtar të Veterinarisë dhe Mbrojtjes së Bimëve (AKVMB), Agjencia Rajonale e Ekstensionit Bujqësor Tiranë, Agjencisë Rajonale të Ekstensionit Bujqësor Korçë,



Agjencisë Rajonale të Ekstensionit Bujqësor Shkodër, Agjencisë Kombëtare të Duhan- Cigareve (AKDC), Institutit të Sigurisë Ushqimore dhe Veterinarisë (ISUV) për raportimin e veprimtarive publike, që të paraqesin prapësimet në lidhje me çështjen objekt hetimi.

KQZ administroi pretendimet e personave përgjegjës për raportimin e veprimtarive publike, nga AZHBR, AKVMB, Agjencia Rajonale e Ekstensionit Bujqësor Tiranë, Agjencisë Rajonale të Ekstensionit Bujqësor Korçë, Agjencisë Rajonale të Ekstensionit Bujqësor Shkodër, AKDC, ISUV të dërguara me e-mail në KQZ, të cilët në tërësi deklaruan se:

“Nisur nga konstatimet e KQZ-së mbi përdorimin e hashtagëve (#) apo sloganeve që mund të interpretohen si mesazhe me karakter politik, që mund të ndikojnë në zgjedhjet për Kuvendin e Shqipërisë, mori menjëherë institucioni masa që të fshihen mesazhe të tilla në postime në rrjete sociale apo në aktivitete të ngjashme”.

Më datë 28.02.2025, ora 12:00, zhvillua seanca publike, ku u ftuan të gjitha palët në proces për t’u shprehur në lidhje me çështjen objekt shqyrtimi. Në tërësi, palët iu qëndruan pretendimeve të paraqitura elektronikisht.

Në vlerësim të pretendimeve të palëve, fakteve dhe provave të administruara në këtë shqyrtim administrativ, çmuj se kërkimi sipas objektit i Koalicionit për Reforma, Integrim dhe Institucione të Konsoliduara / KRIIK, është i mbështetur në ligj, përkatësisht në nenin 91, pika, 1 të Kodit Zgjedhor, *“Me përjashtim të rasteve të parashikuara me ligj, nuk mund të përdoren ose të vihen në mbështetje të kandidatëve, të partive politike ose të koalicioneve në zgjedhje burime të organeve apo enteve publike në nivel qendror ose vendor, apo çdo lloj enti tjetër ku shteti zotëron kapitale apo kuota ose/dhe emëron shumicën e organit mbikëqyrës apo organit administrues të entit, pavarësisht nga burimi i kapitalit ose pronësia”.* Po ky nen parashikon se **“burime”** quhen asetet e luajtshme dhe të paluajtshme, të parashikuara në nenin 142 të Kodit Civil, si dhe çdo burim njerëzor i institucionit”.

Vënia në dispozicion e faqeve zyrtare në “facebook” apo çdo mjeti tjetër elektronik (media sociale) të institucioneve publike për publikimin e postimeve apo të ripostimeve të cilat përmbajnë hashtag #, slogane me karakter politik/elektoral në zgjedhje, apo thirrje për mbështetje në zgjedhje nga ana e këtyre institucioneve përbën përdorim të burimeve publike.

Nga hetimi administrativ u provua se postimet, ripostimet dhe pëlqimet janë bërë në faqet zyrtare të rrjetit social “Facebook” të institucioneve subjekt i këtij denoncimi.

Pas verifikimeve të kryera nga ana jonë, u konstatua se postimet, ripostimet dhe pëlqimet, me karakter politik janë fshirë nga rrjetet sociale të institucioneve.

Sa më sipër, vlerësoj se duhet të pushohet hetimi, duke i’u tërhequr vëmendje Drejtuesve të Institucioneve Publike që të tregojnë kujdes të shtuar në publikimin e postimeve apo ripostimeve të ndryshme me përmbajtje politike apo elektorale, duke mos lejuar shpërndarjen dhe ripostimin e veprimtarive politike apo elektorale të Institucioneve të tyre eprorë, pasi përbën shkelje të dispozitave ligjore të Kodit Zgjedhor dhe vendimit nr. 9, datë 24.12.2020, të Komisionit Rregullator, të ndryshuar.

PËR KËTO ARSYE:

Bazuar në nenin 19, pika 1, shkronjat “dh”, “f ” dhe “n”, pika 2, nenin 91 të ligjit nr. 10019, datë 29.12.2008, “Kodi Zgjedhor i Republikës së Shqipërisë”, të ndryshuar, vendimin nr. 9, datë 9.3.2021, dhe vendimin nr. 9, datë 24.12.2020, të Komisionit Rregullator, të ndryshuar,

V E N D O S:

1. Pushimin e hetimit administrativ të denoncimit nr. 20 ID, datë 17.02.2025, të regjistrit të denoncimeve, të KRIIK ndaj:
 - Zj. Ardita Kuçi, Drejtor i Përgjithshëm, Agjencia për Zhvillim Bujqësor dhe Rural;
 - Z. Ilir Ajdini, Drejtor i Përgjithshëm, Autoriteti Kombëtar i Veterinarisë dhe Mbrojtjes së Bimëve;
 - Z. Ali Kaxhaj, Drejtor, Agjencia Rajonale e Ekstensionit Bujqësor Tiranë;
 - Z. Vullnet Gjolla, Drejtor, Agjencia Rajonale e Ekstensionit Bujqësor Korçë;
 - Z. Pjerin Spathari , Drejtor, Agjencia Rajonale e Ekstensionit Bujqësor Shkodër;
 - Z. Gentian Selami, Drejtor, Agjencia Kombëtare e Duhan – Cigareve;
 - Zj. Jonida Boçi, Drejtor i Përgjithshëm, Instituti i Sigurisë Ushqimore dhe Veterinarisë.
2. Rezultatet e këtij vendimi i njoftohen palëve nëpërmjet adresës së postës elektronike.
3. Ky vendim hyn në fuqi menjëherë dhe publikohet në faqen zyrtare të internetit të Komisionit Qendror të Zgjedhjeve.
4. Kundër këtij vendimi mund të behët ankim në Komisionin e Ankimimeve dhe Sanksioneve brenda 3 (tre) ditëve nga shpallja e tij.

Komisioneri Shtetëror i Zgjedhjeve

Ilirjan CELIBASHI